

欲興大獄。故矯爲異詞。而亟磔張於市。實則終無確供也。莫子偲先生之弟某於時署江寧府。親覩其事。見春冰室野乘。如俗所言馬新貽漁色負友。張汝祥爲友復仇。近人且以其事演成新劇。幾成鐵案。殆當時問官含糊。以致事後議論蜂起。以訛傳訛也。

唐景星

香山唐景星觀察（廷樞）洞悉歐洲情勢。有幹才。同治初奉旨在總理衙門行走。時大臣未諳歐洲交涉之術。每歐使盛氣相凌。諸大臣輒噤縮相顧。不敢發一語。於是外人玩侮益甚。一日威使爭一事未得。輒拍案厲聲。唐忽奮拳起曰。威安馬汝何得如此。威怒曰。汝何故無禮。敢道呼我名。唐曰。此何地。而汝敢拍案。吾何得復有禮於汝。威使出不意。聞是言。遂稍戢其威。後有人問唐曰。汝何以敢得罪大使。唐曰。吾在彼久。熟知彼中事。在公堂拍案。彼已有過。故彼無以罪我也。然大臣等終以唐在衙門。恐易啟釁。遂出之。

文中堂二則

同治朝有西國公使六人請覲見。文中堂與議禮節極

嚴。甚至將茶杯擲碎。公使初欲帶刀。并欲多帶從人。文皆不可。是日諸使入覲。帶人頗多。文命每門截留數人。至紫光閣。裁餘繙譯而已。（按此舉。自差強人意。惟惜徒務其末耳。）

自中西立約互市。朝廷設總理衙門。以大學士以下九卿以上數人爲總理各國事務大臣。多寡無定員。其章京則以閣部司員考充之。如軍機例。凡遇中外交涉事件。泰西諸國駐京使臣（其自稱曰全權大臣）多赴總理衙門。與中朝諸大臣定議。顧夷性狡譎。恃其機器舟械之利。出語驕橫。不可制。文相國祥以忠忱摯悃。誠實不欺。默化其鷙悍之氣。遇事持以定力。雖敵情萬變。而不爲所撓。同治一朝邊事。尙不至釀成大釁者。相國一人力也。聞西人每屆歲首。輒遣書通商諸大臣。以爲履端之賀。其稱文相國必曰忠鯁清廉。而微嫌其與彼爲難。餘皆以圖融識時務譽之。否或稱甲第之華美。車騎之都麗。謂太平宰相。安富尊榮。固應爾爾。

倭文端阻開同文館

同文館之始開也。朝議擬選閣部翰林官年少聰穎者